

**АВГУСТА В 9-Й ДЕНЬ.**  
**СВЯТАГО АПОСТОЛА МАТФИЯ**  
**НА ВЕЧЕРНИ**

Блажен муж: 1-й антифон.

На Господи, воззва: стихиры на 8: праздника 3 и святого 5.

Стихиры праздника, глас 2.

Подобен: Егда от Древа:

**Приидите**, пресветлое Христово Божественное преобразование \* верно спразднуем \* и, изменившеся ныне изменением добрым, \* совзыдем Духом к высокому добродетелей верху учеников Христовых: \* яко да с ними, научившеся странных таин явлению, \* Спаса Господа славим.

**Радуйся** и веселися благоговейно, \* верных Честная Церковь, \* ныне празднующи сей честный и всесветлый праздник: \* безобразие бо человека \* всех Владыка, ныне преобразующийся, \* просвещает ясно зарею светлости неизреченная, \* паче зари солнца сияние испущающа светло.

**Всех Бог Сый** и Зиждитель, \* богатством милосердия неизреченным прием зрак рабий, \* Сий омрачения спасает ныне древняго, \* облистав лицом \* и обнажив сияние Божества во плоти Своей, \* отонудуже ужасни со страхом \* и ницы падше, ученицы \* Владыце всех поклонипася.

Ины стихиры апостола, глас 1.

Подобен: Всехвальнии мученицы:

**Матфие** апостоле, \* лик Божественный наполнил еси, \* из негоже Иуда испаде. \* И Божественными блистаниями мудрых твоих словес \* тьму отгнал еси идолонеистовства \* Божиею благодатию. \* И ныне молися \* даровати душам нашим мир и велию милость. [Дважды.]

**Матфие** блаженне, \* Едем мысленный потекл еси, \* яко река, наводняема \* Божественными водами, \* и землю напоении тайными напоил еси \* и сию плодоносну показал еси. \* Темже молися \* даровати душам нашим мир и велию милость. [Дважды.]

**Матфие** Богодухновенне, \* коло мирское осветиша молнии учений твоих, \* всех просвещающе, \* всех наставляюще к Божественному познанию, \* приятелища Света содевающе \* прежде спящих в ноци суетства \* и во тьме всякаго безбожия.

Слава, глас 6:

**Излияся** благодать во устнах твоих, \* славне апостоле Матфие, \* и был еси светильник Церкви Христовы, \* уча словесныя овцы веровати в Троицу Единосущную \* и во едино Божество.

И ныне, глас 2:

**Иже** светом Твоим всю вселенную освятив, \* на горе висоце преобразился еси, Блаже, \* показав учеником Твоим силу Твою, \* яко мир избавляеши от преступления. \* Темже вопием Ти: \* Милосерде Господи, спаси души наша.

Вход, прокимен дне, чтения три.

### Деяний святых апостол чтение (глава 1, 15–26):

**В**о дни твѣя, востав Петр посреде ученик, рече (бе же имен народа вкупе яко сто и двадесѣть): мужие братие, подобаше скончатися писанию сему, еже предрече Дух Святый усты Давидовыми о Иуде, бывшем вожди, емшим Иисуса. Яко причтен бе с нами и приял бяше жребий службы сея. Сей убо стяжа село от мзды неправедныя, и, ниц быв, проседеся посреде, и излися вся утроба его. И разумно бысть всем живущим во Иерусалиме, яко нарецися селу тому своим их языком Акелдама, еже есть село крове. Пишет бо ся в книзе псаломстей: да будет двор его пуст, и да не будет живущаго в нем, и епископство его да примет ин. Подобает убо, от сходящихся с нами мужей во всяко лето, в неже вниде и изыде в нас Господь Иисус, начен от крещения Иоаннова, даже до дне, вонже вознесся (на Небо) от нас, свидетелю воскресения Его быти с нами единому от сих. И поставиша два: Иосифа, нарицаемаго Варсаву, иже наречен бысть Иуст, и Матфия. И, помолившися, реша: Ты, Господи, Сердцеведче всех, покажи, егоже избрал еси, от сею двою единого, прияти жребий служения сего и апостольства, из негоже испаде Иуда, ити в место свое. И даша жребия има. И паде жребий на Матфия. И причтен бысть ко единонадесяти апостолом.

### Соборнаго послания Иоаннова чтение (1, главы 3, 21–4,6):

**В**озлюбленнии, аще сердце наше не зазрит нам, дерзновение имама к Богу. И егоже, аще просим, приемлем от Него, яко заповеди Его соблюдаем и угодная пред Ним творим. И сия есть заповедь Его, да веруем во Имя Сына Его Иисуса Христа и любим друг друга, якоже дал есть заповедь нам. И соблюдаяй заповеди Его в Нем пребывает, и Той в нем, и о сем разумеем, яко пребывает в нас, от Духа, Егоже дал есть нам. Возлюбленнии, не всякому духу веруйте, но искушайте духи, аще от Бога суть, яко мнози лжепророцы изыдоша в мир. О сем познавайте Духа Божия и духа лстча: всяк дух, иже исповедует Иисуса Христа, во плоти пришедша, от Бога есть. И всяк дух, иже не исповедует Иисуса Христа, во плоти пришедша, от Бога несть, и сей есть антихристов, егоже слышасте, яко грядет, и ныне в мире есть уже. Вы от Бога есте, чадца, и победисте тех, яко болии есть Иже в вас, нежели иже в мире. Они от мира суть, сего ради от мира глаголют, и мир тех послушает. Мы от Бога есмы: иже знает Бога, послушает нас, и иже несть от Бога, не послушает нас.

### Соборнаго послания Иоаннова чтение (1, глава 4, 11–16):

**В**озлюбленнии, аще сице возлюбил есть нас Бог, и мы должны есмы друг друга любити. Бога никтоже нигдеже виде. Аще друг друга любим, Бог в нас пребывает, и любви Его совершенна есть в нас. О сем разумеем, яко в Нем пребываем, и Той в нас, яко от Духа Своего дал есть нам. И мы видехом и свидетельствуем, яко Отец посла Сына Спасителя миру. Иже аще исповесть, яко Иисус есть Сын Божий, Бог в нем пребывает, и той в Бозе. И мы познахом и веровахом любовь, юже имать Бог в нас. Бог Любы есть, и пребываяй в любви в Бозе пребывает, и Бог в нем пребывает.

### На стиховне стихиры, глас 6.

**Подобен:** Триденевен:

**В**ообразяся за милосердие, Христе, \* во Адама, перваго человека, от Девы, \* явился еси вторый Адам, \* на горе же, Спасе мой, Фаворстей преобразился еси, \* обнажая Божество Твое.

**Стих:** Твоя суть небеса, \* и Твоя есть земля.

**У**дивишася, зряще, \* Твоя благодати лучший закона, \* преобразования, Христе, на горе святей, \* с нимиже покланяемся Тебе \* со Отцем и Божественным Духом.

**Стих:** Фавор и Ермон \* о Имени Твоем возрадуется.

**П**росвещается тварь ясно Твоим преобразованием, Христе, \* еже Божественным апостолом на Фаворе, \* Моисею же и Илии, показал еси, Бог сый, \* неизреченно просияв паче солнца.

**Слава, глас 2:**

Ревности Божественныя исполнен, \* апостоле Матфие досточудне, \* ревнуя, поревновал еси Богу Вседержителю, \* Иже и Божественных тя чудес исполнена показа, \* странную бо ревность имея, \* действием нрав стяжал еси. \* Темже, в Вышних сый, \* с Вышними лики вселяемь, \* молися, Боговидче, Слову, Христу Богу нашему, \* даровати нам велию милость.

**И ныне, глас тойже:**

Иже на горе Фаворстей \* преобразяся во славе, Христе Боже, \* и показав учеником Твоим славу Твоего Божества, \* озари и нас светом Твоего разума \* и настави на стезю заповедей Твоих, \* яко един Благ и Человеколюбец.

**Тропарь апостола, глас 3:**

Апостоле святыи Матфие, \* моли Милостиваго Бога, \* да прегрешений оставление \* подаст душам нашим.

**Слава, и ныне, праздника, глас 7:**

Преобразился еси на горе, Христе Боже, \* показавый учеником Твоим славу Твою, \* якоже можаху, \* да возсияет и нам, грешным, \* Свет Твой присносущный \* молитвами Богородицы, \* Светодавче, слава Тебе.

## НА УТРЕНИ

На Бог Господь: тропарь праздника, глас 7:

Преобразился еси на горе, Христе Боже, \* показавый учеником Твоим славу Твою, \* якоже можаху, \* да возсияет и нам, грешным, \* Свет Твой присносущный \* молитвами Богородицы, \* Светодавче, слава Тебе. [Дважды]

Слава, апостола. глас 3:

Излияся благодать во устнах твоих, \* славне апостоле Матфие, \* и был еси светильник Церкви Христовы, \* уча словесныя овцы веровати в Троицу Единосущную \* и во едино Божество.

И ныне, праздника.

По 1-й стихологии седален, глас 2:

Уловив языки, апостол славный, \* научи концы земныя Тебе кланяться со Отцем и Духом, Христе Боже. \* Того ради утверди Церковь Твою \* и верным низпосли благословение Твое, \* Едине Милостиве и Человеколюбче.

Слава, и ныне, праздника, глас 4.

Подобен: Удивися Иосиф:

Человеческое изменение, еже со славою Твоею, Спасе, \* второе и страшное Твоего пришествия показуй, \* на горе Фаворстей преобразился еси. \* Илия и Моисей глаголаху с Тобою, \* и триех от ученик спривав, \* иже видевшие, Владыко, славу Твою, блистанию Твоему удивишася. \* Иже тогда сим Свет Твой возсиявый, просвети души наша.

По 2-й стихологии седален, глас 4:

Лучу, яко солнце правды, испусти тя Христос, \* просветити всю землю, апостоле славный Матфие, \* Божественными твоими молитвами озаряеши \* и Божественным светом невечерним всех просвещаеши, \* верою совершающих святую память твою.

Слава, и ныне, праздника, глас тойже.

Подобен: Вознесыйся:

Возшед со ученики на гору и во славе Отчи облистав, \* с Моисеом Илия Тебе предстоят, \* закон бо и пророцы яко Богу служат. \* Емуже и сыновство естественное Родитель исповедая, нарицаше Сына, \* Егоже воспеваем с Тобою и Духом.

По полиелеи седален, глас 8.

Подобен: Премудрости:

Идольскую гордыню низложив, Спасовы страсти желая, Матфие апостоле, \* явился еси миру, с небесе всем источая чудеса, \* и языком был еси, преблаженне, учитель. \* Темже твою память по достоинству почитаем, \* в песнях славяще и верно величающе, Богогласе пребогате, \* моли Христа Бога грехов оставление подати \* чтущим любовию святую память твою.

Слава, и ныне, праздника, глас 4.

Подобен: Удивися Иосиф:

На горе Фаворстей преобразился еси, Боже, \* посреде Илии и Моисея премудрых, \* со Иаковом, и Симоном, и Иоанном. \* Петр же, сый ту, сия Тебе глаголаше: \* добро есть zde сотворити три сени, \* едину Моисею, и едину Илии, и едину Тебе, Владыце Христу. \* Иже тогда сим Свет Твой возсиявый, просвети души наша.

Степенна, 1-й антифон 4-го гласа.

Прокимен, глас 4: Во всю землю изыде вещание их, \* и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Всякое дыхание:

#### Евангелие от Иоанна, зачало 67.

**Во** время оно, явился Иисус учеником Своим, востав от мертвых. И глагола Симону Петру: Симоне Ионин, любиши ли Мя паче сих? Глагола Ему: ей, Господи, Ты веси, яко люблю Тя. Глагола ему: паси агнцы Моя. Глагола ему паки второе: Симоне Ионин, любиши ли Мя? Глагола ему: ей, Господи, Ты веси, яко люблю Тя. Глагола ему: паси овцы Моя. Глагола ему третье: Симоне Ионин, любиши ли Мя? Оскорбе же Петр, яко рече ему третье, любиши ли Мя; и глагола Ему: Господи, Ты вся веси, Ты веси, яко люблю Тя. Глагола ему Иисус: паси овцы Моя. Аминь, аминь, глаголю тебе, егда бе юн, поясахся сам, и хождаше, аможе хотяше, егда же состареешися и воздежеш руце твои, и ин тя пояшет, и ведет, аможе не хочеш. Сие же рече, назнаменуя, коею смертию прославит Бога. И сия рек, глагола ему: иди по Мне. Обращься же Петр, виде ученика, егоже любляше Иисус, во след идуща, иже и возлеже на вечери на перси Его, и рече: Господи, кто есть предай Тя? Сего видев Петр, глагола Иисусови: Господи, сей же что? Глагола ему Иисус: аще хочу, да той пребывает, дондеже прииду, что к тебе? Ты по Мне гряди. Изыде же слово се в братию, яко ученик той не умрет, и не рече ему Иисус, яко не умрет, но аще хочу тому пребывать, дондеже прииду, что к тебе? Сей есть ученик свидетельствующий о сих, иже и написа сия, и вем, яко истинно есть свидетельство его. Суть же и ина многа, яже сотвори Иисус, яже аще по единому писана бывают, ни самому мноу всему миру вместити пишемых книг. Аминь.

#### По 50-м псалме стихира, глас 6:

**Излияся** благодать во устнах твоих, \* славне апостоле Матфие, \* и был еси светильник Церкви Христовы, \* уча словесныя овцы веровати в Троицу Единосущную \* и во едино Божество.

#### Канон праздника со ирмосом на 6. Творение кир Космы, глас 4.

##### Песнь 1

**Ирмос:** Лицы израильстии, \* невлажными стопами \* понт Чермный и влажную глубину прогнавше, \* всадники тристаты враги видяще в ней погружены, \* с веселием пояху: \* поим Богу нашему, яко прославися.

**Глаголы** животныя другом Христос и о Божественном наказуя Царствию, рече: во Мне Отца познайте; Светом яко облистая неприступным, в радости поюще: поим Богу нашему, яко прославися.

**Силою** язык облечетесь, друзи ученицы, чудни же будете в богатстве их, яко славы наполнитесь, яко явлюся светлее солнца, облистая в радости поющих: поим Богу нашему, яко прославися.

**Днесь** Христос, на горе Фаворстей просияв ясно Божественною зарею, якоже обещася, учеником обнажи зрак, светоносныя же наполнившеся Божественныя зари, в радости пояху: поим Богу нашему, яко прославися.

**Ин канон** святого апостола, на 8, егоже краегранесие: Песньми тя пою, Матфие,

Христов друже. **Творение Феофаново, глас 8.**

**Песнь 1**

**Ирмос: Поим Господеви, \* проведшему люди Своя сквозе Черное море, \* яко Един славно прославися.**

**Песньми** твое светоносное поющу, Матфие, ныне торжество, с Небесе ми зарю спасения дати молися.

**Велие** солнце явился еси Света Великаго, досточудне, с нами бо бывшу, беседовал еси, неходатайственне, апостоле.

**Законом** Владыки, блаженне, повинуюся, мрежею уловляеши твоего языка из глубины неведения концы.

**Богородичен: Всего** мя спасает Слово Пребожественное благию, восхотев из утробы Твоя воплотитися, Чистая Мати Дево.

**Катавасия праздника: Лицы израильтестии:**

**Песнь 3**

**Ирмос: Лук** сильных изнеможе, \* и немощствующии препоясаша силою, \* сего ради утвердися в Господе сердце мое.

**Во** всего Адама облекся, Христе, очерневшее, изменив, просветил еси древле естество и изменением зрака Твоего богосоделал еси.

**Столпом** огнезрачным и облаком древле Иже в пустыни Израиля ведый, днесь на горе Фаворстей неизреченно во свете Христос просия.

**Ин**

**Ирмос: Ты** еси утверждение \* притекающих к Тебе, Господи, \* Ты еси Свет омраченных \* и поет Тя дух мой.

**Возмог** еси, укрепляемь живоначалным, мудре, мановением, крепкаго корысти восхитити и поработити благодатию.

**Любя** Учителя, служба Того мановением вседейственным, от прелести спасаеши человеки, досточудне.

**Тя** двенадцатному числу учеников лика святого, вседейственный Дух исполняюща, Богоглаголиве, избирает.

**Богородичен: Имея** Тя помощь, злых врагов стремления, Чистая, не ужасаюся, имея Тя Предстательницу, тех побеждаю полки.

**Кондак праздника, глас 7:**

**На** горе преобразился еси, \* и якоже вмещаху ученицы Твои, \* славу Твою, Христе Боже, видеша, \* да егда Тя узрят распинаема, \* страдание убо уразумеют вольное, \* миру же проповедят, \* яко Ты еси воистинну Отчее сияние.

**Икос: Встаните,** ленивии, иже всегда низу поникшии в землю души моя помыслы, возмיתесь и возвыситесь на высоту Божественнаго восхождения. Притецем к Петру и к Зеведеевым и вкупе со оными Фаворскую гору достигнем, да видим с ними славу Бога нашего, глас же услышим, егоже свыше слышаша и проповедаша Отчее сияние.

**Седален апостола, глас 8.**

**Подобен: Премудрости:**



**М**олниями твоих словес Божественных \* попалил еси прелесть лукавую, верныя просветил еси, \* воспевати еже во плоти пришествие, блаженне, всеми Владычествующаго, \* и Того страсти Божественней поревновал еси. \* Отонудуже сошедшеся, святую твою память совершаем, веселящися, \* и согласно вопием ти: \* Матфие апостоле, моли Христа Бога согрешений оставление даровати \* чтущим любовию святую память твою.

**Слава, глас 2:**

**Н**езаходимое солнце явися, \* Солнцу великому присовокуплься, \* темже и просвети сущих во тьме неразумия, \* отгоняя недуги от душ и телес, Матфие, таин самовидче, \* и служителю воистинну Христов, \* присно молися Ему о всех нас.

**И ныне, праздника, глас 8.**

**Подобен: Повеленное:**

**С**окровенную молнию под плотию существа Твоего, Христе, \* и Божественнаго благолепия на святей показал еси горе, Благодетелю, \* просияв сущим с Тобой учеником, \* и, разумевше нестерпиму суцз славу Твою,— Свят еси,— возопиша, \* яко, неприступен Сый, виден был еси плотию миру, Едине Человеколюбче.

**Песнь 4**

**Ирмос: Услышах славное смотрение Твое, Христе Боже, \* яко родился еси от Девы, \* да от лести избавиши зовущия: \* слава силе Твоей, Господи.**

**З**акон в Синаи писанием воображая, Христе Боже, во облаце, и огни, и мраце, и в вихре явился еси носим: слава силе Твоей, Господи.

**Д**а увериши славное строение Твое, Христе Боже, яко Сый прежде век и Тойже на облаце восхождение положивый, на Фаворе неизреченно просиял еси.

**С**оглаголююще, предстояху раболепно Тебе, Владыце Христу, к нимже парюю огня и мрака и тонким хладом беседовал еси: слава силе Твоей, Господи.

**В**озвещаху славное Креста ради Твоего, на Фавор пришедше, иже во огни Тя и купине древле предвидевый Моисей и взятый на колеснице огненной Илия, Христе.

**Ин**

**Ирмос: Услышах, Господи, \* смотрения Твоего таинство, \* разумех дела Твоя \* и прославих Твое Божество.**

**Е**дино естество Божества, едино царство и господство возвещая, преблаженне, языков стада уловил еси.

**Н**аведе тя Господь на море жития, премудре, якоже коня, смущающа многобожия горькия воды.

**С**ловом Божественным обновил еси оледеневшая сердца, славне, всеяв благочестие, истины познание.

**Богородичен: Д**евства сосуде и невместимаго естества селение, душу мою просвети, омраченную многими страстьми.

**Песнь 5**

**Ирмос: От света пресекий первородный свет, \* яко во свете дела поют Тя, Христе, Содетеля, \* во свете Твоем пути наша направи.**

**П**ред лицом Твоим горы уклонишася, свет бо и пред ногами неботечныя лучи, Христе, солнца прииде, зрак земли яко прияти благоволил еси.

**Се** Спас, вопияху Моисей и Илия учеником, на горе святей Фаворстей оглашаемым, Христос, Егоже древле провозвестихом Сущаго Бога.

**Не**изменное естество, человеческому примешся, обильно невестественнаго Божества Свет изблажив апостолом, неизреченно возсия.

**Тя**, присносущное сияние, во Отечестей славе ученицы яко видевше возсиявша, Христе, Тебе вопияху: во свете Твоем пути наша направи.

**Ин**

**Ирмос:** Вскую мя отринул еси \* от лица Твоего, Свете незаходимый, \* и покрыла мя есть чуждая тьма, окаяннаго? \* Но обрати мя и к свету заповедей Твоих \* пути моя направи, молюся.

**Я**ко многоплодну лозу, истинный тя простре виноград, делающа грозд, проливающа вино спасительное, егоже пивше, блаженне, одержимии неразумием, прелести пиянство отвергоша.

**У**чеников двенадесятых явился еси, исполняя лик блаженный, из негоже предатель себе отверг, приобрете горькое удушение, на Христа воздвиг пяту, тайновещателю Матфие чудне.

**С**оль божественна, вверглся еси, блаженне, в мир, Матфие апостоле, гной прелести очищая сладкими учении, отгоня болезни и отъемля язвы душ и телес, прехвальне.

**Богородичен:** Безобразных риз и древняго совлечеся умерщвления Адам, Дево, пречистым Твоим рождеством, Богоневесто и во одежду святу и истинну облечеся, никакоже осквернену страстьми.

**Песнь 6**

**Ирмос:** Внегда скорбети ми, \* возопих ко Господу, \* и услыша мя Бог спасения моего.

**С**ияния паче солнца Свет яснейший, Спас, просияв на Фаворе, нас просветил есть.

**В**озшед на гору Фаворскую, преобразился еси, Христе, и, леть всю омрачив, нас просветил еси.

**Тя** Бога познавше славнии апостоли, на Фаворе же, Христе, удивльшеся, колена преклониша.

**Ин**

**Ирмос:** Очисти мя, Спасе, \* многа бо беззакония моя, \* и из глубины зол возведи, молюся, \* к Тебе бо возопих, и услыши мя, \* Боже спасения моего.

**Б**ог был еси положен, единением Божественным обожаемь, и, перводелательны от Бога лучи приим, верныя просветил еси и землю от мглы идольския очистил еси.

**С**е тебе вмещается, ученику, всяко проречение священных пророк: самовидец бо быв, Егоже древле провозвестиша, служителю Матфие, подобник же и апостол.

**Богородичен:** Священие умное и неприкосновенно очистилище, свещник злат и трапезу одушевлену, Хлеб носившую живота, Дево, вернии, Тя именуем.

**Кондак, глас 4.**

**Подобен:** Явился еси днесь:



Светозарное, яко солнце, во весь мир изшедшее вещание твое \* просвещает языческую Церковь благодатию, \* чудоносче Матфие апостоле.

**Икос:** Струю слова подаждь ми, Господи, водное естество содеявый, и сердце мое укрепи, Благоутробне, Иже землю утвердивый словом Твоим, и просвети мое помышление, светом, яко ризою, одевайся, да глаголю и пою подобная: достойно почести, Многомилостиве, Твоего Матфия апостола.

### Песнь 7

**Ирмос:** Авраамстии иногда в Вавилоне отроцы \* пещный пламень попраша, \* песнями взывающе: \* отец наших Боже, благословен еси.

Облиставшися Светом неприступным славы на Фаворстей горе, апостоли Христу вопияху: отец наших Боже, благословен еси.

Сиянием Божественнаго шума, и росодательным облаком, Христе, и зарею Твоею наслаждаеми, апостоли пояху: отец наших Боже, благословен еси.

**В** неприступном Свете, яко виде Тя Петр, на Фаворстей горе облиставша, Христе, возопи: отец наших Боже, благословен еси.

**С** Начальником жизни Христом суще, дети Зеведеевы, яко испусти зрака Свет, возгремеша: отец наших Боже, благословен еси.

### Ин

**Ирмос:** Отроцы еврейстии в пещи \* попраша пламень дерзновенно \* и на росу огонь преложиша, вопиюще: \* благословен еси, Господи Боже, во веки.

**Т**ок изсушил еси прелести наводнением твоея Божественныя мудрости и потоком пищи напоил еси верою вопиющия, славне: Боже, благословен еси.

**С**илою Бога Всесильнаго изнемогоша вражия коварства пред лицом твоего, апостоле, шествия и сокрушишася горы же и холми безбожия.

**Богородичен:** Се, Юже рече Деву духом великий Исаия, во чреве Бога зачат и раждает, Емуже поем: Господи Боже, благословен еси.

### Песнь 8

**Ирмос:** В Вавилоне отроцы, \* Божественною распалаеми ревностию, \* мучителя и пламене прещение мужески попраша \* и, посреде огня ввержени, орошаеми, пояху: \* благословите, вся дела Господня, Господа.

**М**ановением вся носяй, ногами пречистыми на гору взыде Фаворскую Христос, на нейже паче солнечныя лучи облиста лицом, иже закону старейшия и благодати показа поющия: благословите, вся дела Господня, Господа.

**Н**еприступною славою на горе явлься неизреченно Фаворстей, неодержимый и незаходимый Свет, Отчее сияние, тварь уяснив, человеки обожи, поющия: благословите, вся дела Господня, Господа.

**С**вященнолепно стояще Моисей же и Илия на горе Фаворе, Божественныя начертание ясно ипостаси видевшие, Христа, во Отечестей облиставша славе, воспеваху: благословите, вся дела Господня, Господа.

**И**же во зраце Божественнаго ради явления лице прославися иногда Моисеово, Христос же, яко ризою, Светом и славою одевается, Света бо самодетелен Сый, озаряет поющия: благословите, вся дела Господня, Господа.

От светородна облака Христа ученицы объята зряще на Фаворе и ницы на землю падше, ум просвещше, со Отцем Сего пояху и Духом: благословите, вся дела Господня, Господа.

### Ин

**Ирмос:** Седмерицею пещь \* халдейский мучитель \* богочестивым неистовно разжже, \* силою же лучшею спасены, сия видеви, \* Творцу и Избавителю вопияше: \* отроцы, благословите, \* священницы, воспойте, \* людие, превозносите во вся веки.

Уста Божия быв, из гортани восхитил еси човекоубийцы, ихже люте пожре и снеть содела своей злобе, мудре, и банею пакибытия сих привел еси Господеви, поюция непрестанно: людие, превозносите во вся веки.

Прелести меча, злобы оружия, оружие быв Божия Слова, славне, до конца истнил еси идольския требы, столпы же и храмы Божественною силою низложил еси, храмы же Троицы соделал еси, вопиюция: людие, превозносите во вся веки.

Словесное явися небо, поведую Единороднаго славу Божию неизглаголанную, Матфий всемудрый, молния благодати, ловец заблуждших, свещник Божественнаго светозарения, неизреченных таинник, того с веселием воспоем согласно.

**Богородичен:** Паче естества зачала еси, паче слова родила еси Содетеля человеческого естества, бывша Человека, Отцу неразлучна, Владычице Чистая. Егоже поет вся тварь: отроцы, благословите, священницы, воспойте, людие, превозносите во вся веки.

### Песнь 9

**Ирмос:** Рождество Твое нетленно явися: \* Бог из боку Твоею пройде, \* яко Платоносец явися на земли \* и с человеки поживе. \* Тя, Богородице, тем вси величаем.

Ужасни новым светолитием внезапно ученицы освещшися, друг друга зряху, удивльшися же и к земли преклоньшися, Тебе, Владыце всех, поклоньшися.

Шум из облака посылашешя богогласен, извествюя чудо: Отец бо Светов,— Сей есть Сын Мой возлюбленный,— апостолом вопияше: Того послушайте.

Новая видевише и преславная, глас Отеческий внушивше, на Фаворе Словесе слуги, изображение Первообразнаго, Сей есть,— вопияху,— Спас наш.

Образе непреманный Суцаго, недвижиме, печать неизменна, Сыне, Слове, мудросте и мышце, деснице Вышняго, Сило, Тя воспеваем со Отцем же и Духом.

### Ин

**Ирмос:** Устрашися всяк слух \* неизреченна Божия снизхождения, \* яко Вышний волею сниде даже и до плоти \* от девического чрева быв Человек. \* Темже Пречистую Богородицу, вернии, величаем.

Друга тя рече Спас, того служаща повелением, блаженне апостоле, и наследника Царствия Своего, в будущий страшный день соседателя, Матфие премудре, двенадесятых ученик исполнение.

Ветрилом, блаженне, Креста прешед волнующееся море жития, достигл еси ко пристанищу покоя и крайнему желанию и, радуяся, ныне предстоиши со апостольским ликом, моля о нас Человеколюбца.

**С**вещник воистинну златозарен, светило Духа сияющее, явися язык твой, пополающ иноплеменная учения, погашающ огонь, мудре, чуждый, свет облистающ во тьме неразумия спящим.

**Богородичен:** Устарила еси едина в женах клятву первозданных, Богоневесто, Неописаннаго плотию рождши описуема, обновила еси пределы естества, Нескверная, разстоящая первее преславным ходатайством Твоим соединила еси.

**Светилен апостола.**

**Подобен:** Духом во святилищи:

**Т**ечение красных твоих ног, Матфие апостоле, \* возвратив к шествию Небесному, возшел еси, радуяся, \* и, Троице представ, во Отце видиши Сына и Духа Божественнаго. \* Сего ради верою пресвященную твою и Божественную празднуем память.

**Слава, и ныне, праздника:**

**С**вете неизменный, Слове, Света Отца нерожденна, в явленнем свете Твоем, \* днесь на Фаворе Свет видехом Отца, Свет и Духа, \* Светом наставляющаго всю тварь.

**На хвалитех стихиры на 6. Праздника 3, глас 2.**

**Подобен:** Доме Евфрафов:

**Н**а горе Фаворстей \* Троицы слава \* яве познася, \* Тебе преобразующуся, \* Спасе мой Преблагий.

**О**блак светел, \* ясно прострися \* в преображении, \* удиви Божественных \* ученик верх.

**И**лия с Моисеом \* предсташа Тебе, Слове, \* в преображении, \* Отец же свидетельствоваше, \* с Небесе вещая.

**И апостола, 3, глас 4.**

**Подобен:** Яко добля:

**Т**ростию благодатною \* от глубины суетства человеки извлекл еси, досточудне, \* Учителя манием повинувся, Матфие, \* просвещшаго по всему твое разумение, \* апостола и честна Богогласника \* тя, всеблаженне, показавша \* Того непостижнаго Божества.

**И**же Духа сияние на тя сниде \* во огненне видении \* и тя, блаженне, Божественное приятелище содела, \* скоро отгоняща безбожия мглу \* и мир просвещающа \* сиянием всемудрых твоих словес, тайноглагольниче, \* апостолов украшение, \* Христов самовидче, блаженне.

**М**олниями проповедания \* яже во тьме седящая, славне, просветив, \* показал еси сыны Владыки и Бога веры ради, \* Егоже страстем ревновал еси и смерти \* и славы был еси наследник, \* яко мудр, яко богогласен, \* яко ученик истины.

**Слава, глас 2:**

**О**ставив земная, \* последовал еси Христу, \* и знаменався дохновением Святаго Духа, \* послан быв от Него в языки погибшия, \* обрати человеки во свет Богоразумия, \* апостоле Матфие, \* и скончав подвиги Божественныя твоя страсти \*

и мук различных, \* душу твою Христу предал еси. \* Того моли, всеблаженне, \* даровати нам велию милость.

**И ныне, праздника, глас тойже:**

**Видеша** на горе Фаворстей \* Моисей же и Илия \* от Девы Отроковицы Бога воплощенна \* человеком на избавление.

**Славословие великое.**

## НА ЛИТУРГИИ

Блаженны, праздника песнь 4-я, на 4, и апостола, песнь 6-я, на 4.

**Закон** в Синаи писанием воображая, Христе Боже, во облаце, и огни, и мраце, и в вихре явился еси носим: слава силе Твоей, Господи.

**Да** увериши славное строение Твое, Христе Боже, яко Сый прежде век и Тойже на облаце восхождение положивый, на Фаворе неизреченно просиял еси.

**Соглаголюще**, предстояху раболепно Тебе, Владыце Христу, к нимже парюю огня и мрака и тонким хладом беседовал еси: слава силе Твоей, Господи.

**Возвещаху** славное Креста ради Твоего, на Фавор пришедше, иже во огни Тя и купине древле предвидевый Моисей и взятый на колеснице огненной Илия, Христе.

**Бог** был еси положен, единением Божественным обожаемь, и, перводелательны от Бога лучи прием, верныя просветил еси и землю от мглы идольския очистил еси. [Дважды.]

**Слава:** Се тебе вмещается, ученику, всяко проречение священных пророк: самовидец бо быв, Егоже древле провозвестиша, служителю Матфие, подобник же и апостол.

**И ныне: Богородичен:** Священие умное и неприкосновенно очистилище, свещник злат и трапезу одушевлену, Хлеб носившую живота, Дево, вернии, Тя именуем.

**Тропарь праздника, глас 7:**

**Преобразился** еси на горе, Христе Боже, \* показавый учеником Твоим славу Твою, \* якоже можаху, \* да возсияет и нам, грешным, \* Свет Твой присносущный \* молитвами Богородицы, \* Светодавче, слава Тебе. [Дважды]

**Тропарь апостола, глас 3:**

**Излияся** благодать во устнах твоих, \* славне апостоле Матфие, \* и был еси светильник Церкви Христовы, \* уча словесныя овцы веровати в Троицу Единосущную \* и во едино Божество.

**Кондак апостола, глас 4.**

**Светозарное**, яко солнце, во весь мир изшедшее вещание твое \* просвещает языческую Церковь благодатию, \* чудоносче Матфие апостоле.

**Кондак праздника, глас 7:**

**На** горе преобразился еси, \* и якоже вмещаху ученицы Твои, \* славу Твою, Христе Боже, видеша, \* да егда Тя узрят распинаема, \* страдание убо уразумеют вольное, \* мирови же проповедят, \* яко Ты еси воистинну Отчее сияние.

**Прокимен праздника, глас 4:** Яко возвеличишася дела Твоя, Господи, вся премудростию сотворил еси.

**И святого, глас 8:** Во всю землю изыде вещание их \* и в концы вселенныя глаголы их.

**Стих:** Небеса поведают славу Божию, творение же руку Его возвещает твердь.

**Апостол Деяний, зачало 2.**

**Во** дни оны, возвратишася апостоли во Иерусалим от горы нарицаемья Елеон, яже есть близ Иерусалима, субботы имущия путь. И егда внидоша, възидоша на горницу, идеже бяху пребывающе, Петр же и Иаков, и Иоанн и Андрей, Филипп и Фома, Варфоломей и Матфей, Иаков Алфеов и Симон Зилот и Иуда Иаковль. Сии вси бяху терпяще единодушно в молитве и молении, с женами и Мариною Материю Иисусовою и с братиею Его. И во дни тья востав Петр посреде ученик, рече, бе же имен народа вкупе яко сто и двадесять: мужие братие, подобаше скончати Писанию сему, еже предрече Дух Святый усты Давидовыми о Иуде, бывшем вожди емшим Иисуса, яко причтен бе с нами и приял бяше жребий службы сея, подобает убо от сходящихся с нами мужей во всяко лето, в неже вниде и изыде в нас Господь Иисус, начен от крещения Иоаннова даже до дне, в онъже вознесся на небо от нас, свидетелю воскресения Его быти с нами единому от сих. И поставиша два, Иосифа нарицаемаго Варсаву, иже наречен бысть Иуст, и Матфия, и помолившеся реша: Ты, Господи, Сердцеведче всех, покажи, егоже избрал еси от сею двою одинаго, прияти жребий служения сего и апостольства, из негоже испаде Иуда, ити в место свое. И даша жребия има, и паде жребий на Матфия, и причтен бысть ко единонадесяти апостолом.

**Аллилуиа праздника, глас 8: Твоя суть небеса, и Твоя есть земля.**

**Аллилуия, глас 1: Исповедят Небеса чудеса Твоя, Господи.**

#### **Евангелие от Луки, зачало 40.**

**Во** время оно, созва Иисус обанадесяте ученика Своя, даде им силу и власть на вся бесы, и недуги целити, и посла их проповедати Царствие Божие и изцелити болящия. И рече к ним: ничесоже возмите на путь, ни жезла, ни пиры, ни хлеба, ни сребра, ни по двема ризама имети. И в онъже дом внидете, ту пребывайте, и оттуду исходите. И елицы аще не приемлют вас, исходяще от града того, и прах от ног ваших оттрясите, во свидетельство на ня. Исходяще же прохождаху сквозе веси, благовествующе и изцеляюще всюду.

**Причастен праздника. Господи, во свете лица Твоего пойдем, и о Имени Твоем возрадуемся во веки.**

**И святаго: Во всю землю изыде вещание их и в концы вселенныя глаголы их.**

#### **СВЯТОЙ АПОСТОЛ И ЕВАНГЕЛИСТ МАТФИЙ**

**Святой** апостол и евангелист Матфий родился в Вифлееме и происходил из колена Иудина. С раннего детства он изучал Закон Божий по Священному Писанию Ветхого Завета под руководством святого Симеона Богоприимца.

**Когда** Господь Иисус Христос явил Себя миру, святой Матфий уверовал в Него как в Мессию, неотступно следовал за Ним и был избран в число 70 апостолов, которых Господь «посылал по два пред лицом Своим» (Лк.10:1). После Вознесения Спасителя апостол Матфий был избран по жребию в число 12 апостолов вместо отпавшего Иуды Искаротского (Деян.6:2, **8:14**). Из Иерусалима вместе с апостолами Петром и Андреем он ходил в Антиохию Сирийскую, был в Каппадокийском городе Тиане и в Синопе. Здесь его заключили в темницу, из которой он был чудесно освобожден святым апостолом Андреем Первозванным.



После этого апостол Матфий путешествовал в город Амасию на берегу Понта. Во время 3-го путешествия святого апостола Андрея, святой Матфий был с ним в Едессе и Севастии. По церковному преданию, он был с проповедью и в Эфиопии Понтийской (ныне Западная Грузия), где претерпел многие муки за Христа.

**К**огда святой апостол Матфий пришел в Македонию, то греки, желая испытать силу проповедуемой веры, дали ему выпить чашу с ядом, от которого человек тотчас же делался слепым. Святой Матфий выпил и не только сам не ослеп, но и исцелил от слепоты более 250 человек, возлагая на них руки и призывая имя Христово. Греки решили все-таки схватить его и посадить в темницу, но он стал для них невидим. В другой раз, когда язычники в ярости бросились, чтобы убить апостола, земля разверзлась и поглотила их. Так проходил святой апостол по странам, всех просвещая светом Евангелия. Из Македонии святой апостол Матфий снова вернулся в Иудею. «Ревности Божественныя исполнен», он творил великие чудеса Именем Господа Иисуса Христа, не переставая духовно просвещать своих соотечественников. Иудейский первосвященник Анан, ненавидевший Христа (по приказу Анана был сброшен с высоты храма апостол Иаков, брат Господень), приказал взять апостола Матфия и представить на суд синедриона в Иерусалиме.

**Н**ечестивый Анан произнес речь, в которой кощунственно хулил Господа. В ответ святой апостол Матфий показал на пророчествах Ветхого Завета, что Иисус Христос – Истинный Бог, Мессия, обещанный Богом Израилю, Сын Божий, Единосущный и Совеchnый Богу Отцу. После этих слов святой апостол Матфий был осужден синедрионом на смерть и побит камнями. Когда святой Матфий был уже мертв, иудеи, скрывая преступление, отсекали ему голову и объявили правительству, что его казнили за непокорность римскому императору.

(Некоторые источники указывают, что святого апостола Матфия распяли на кресте, другие – что он скончался в Колхиде.) Смерть апостола за Христа последовала около 63 года.

**Р**усский паломник Антоний свидетельствовал, что еще в 1200 году глава святого апостола Матфия находилась в Константинополе, в храме во имя Двенадцати святых апостолов.